



## ***Komunikadu Imprensa***

**17 Fevereiru 2014**

### **Tribunál Distritál Baucau kondena autór kazu violénsia doméstika neen ho pena multa**

Iha 6, 11, no 13 Fevereiru 2014, Tribunál Distritál Baucau prezide leitura desizaun ba kazu ofensa ba integridade fízika simples ho natureza violénsia doméstika hamutuk neen (6). Kazu neen ne'e hotu-hotu tribunál kondena ho pena multa hamutuk \$ 45.00 ho istimasaun kada lora \$ sei selu \$ 0.50 durante lora 90. Tribunál mós fiksa pena alternativu lora 60 prizaun wainhira arguidu sira la kumpri pena multa refere.

*“JSMP apresia esforsu tribunál ne'ebé kontinua fo prioridade hodi prosesu kazu krime ho natureza violénsia doméstika no kodenda arguidu sira, maibé JSMP hanoin katak ba kazu sira ho natureza violénsia doméstika ladun apropiadu atu aplika pena multa tanba ne'e sei fo todan liu tan problema finansieru iha familia laran,”* dehan Diretór Ezekutivu JSMP, Luis de Oliveira Sampaio.

Iha relatóriu JSMP nian kona-ba Lei Kontra Violénsia Doméstika: Tinan Tolu iha Implementasaun ho nia Obstakulu sira, ne'ebé lansa ba públiku iha Novembru 2013, rekomenda ba tribunál sira atu tenke fó orden ba kompensasaun sivíl ba vítima iha kazu violénsia doméstika hotu-hotu. Kompensasaun tenke fó reparasaun ba vítima, ne'ebé la'os deit ba kanek fíziku, maibé mós ba sofrimentu emocionál no lakon rendimentu nu'udar rezultadu hosi kanek ne'ebé mak hamosu hosi arguidu. Tribunál tenke asegura hodi fó prioridade ba selu kompensasaun duké selu multa.

Iha 6 Fevereiru 2014, Tribunál julga kazu ho natureza violénsia doméstika 4, iha 11 no 13 Fevereiru 2014 Tribunál julga no kondena kazu violénsia ho kategoria ofensa ba integridade fízika rua tan. Kazu neen (6) refere, kazu tolu akontese iha Distritu Viqueque no kazu tolu akontese iha Distritu Baucau.

Kazu hirak ne'e hotu-hotu Ministériu Públiku akuza arguidu sira nu'udar autór material ba krime ofensa ba integridade fízika simples ne'ebé regula iha artigu 145 Kódigu Penál kónjuga ho artigu 35 Lei Kontra Violénsia Doméstika. Tribunál konsidera katak arguidu sira provadu komete krime ofensa ba integridade fízika simples ho natureza violénsia doméstika bazeia ba arguidu sira konfisaun durante inisiu julgamentu.

Tribunál mós konsidera faktu no sirkunstansia atenuante sira hanesan konfesa faktus hotu ne'ebé akuza ba sira, arepende ba sira nia hahalok, laiha asidente krimínál no diak malu ona ho lezada/u sira.

Audiénsia julgamentu ba kazu 6 ne'e prezide husi juis singulár diferente hanesan Dr. Afonso Carmona lee desizaun ba kazu 5 no Dr. José Gonçalves lee desizaun ba kazu 1. Minstériu Públiku representa husi Dr. Pascasio de Rosa Alves kazu 3 no Dr. Aderito Tilman representa kazu 3. Husi parte defeza mak Dr. Grigorio de Lima akompaña kazu 4 no Dr. Jonas Henrique da Costa akompaña kazu 2.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883 | 77295795

Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPTl

